

UMS santuni komuniti Edu-Tourism Kampung Sayap

UB 01.03.2024 P.04

KOTA KINABALU: Universiti Malaysia Sabah (UMS) menerusi Pusat Komunikasi Korporat (PKK) menyantuni komuniti luar bandar di Kampung Sayap, Kota Belud dengan mengagih 60 bakul makanan kepada ibu tunggal, warga emas terlanjut dan individu kelainan upaya.

Pengarah PKK UMS, Dr. Jakaria Dasan, berkata kunjungan antara lain bertujuan mempromosikan pelancongan berasaskan pendidikan serta menjalankan beberapa aktiviti bersama penduduk.

Menersi kepimpinan Naib Canselor UMS, Profesor Dr. Kasim Mansor, setiap warga UMS digesa untuk sentiasa peka kepada usaha mendekati komuniti.

“Bagi melakukan pemindahan dan perkongsian ilmu yang relevan dengan sesebuah komuniti yang didampingi.

“Usaha menyantuni komuniti di luar bandar Sabah bertujuan memperkasa kefahaman warga UMS mengenai Komuniti Madani itu



PRIHATIN: Aming (tengah) menyerahkan bakul makanan kepada penduduk Kampung Sayap sambil disaksikan oleh Jakaria (dua kanan) dan Ketua Pentadbiran PKK UMS, Norliza Abdullah.

sendiri,” katanya.

Menurutnya, di Kampung Sayap, terpampang jelas wujudnya ciri-ciri Komuniti Madani.

“Komuniti di kampung ini mempunyai persatuan atau perkumpulan masyarakat yang sentiasa bersatu padu dalam aktiviti mema-

jukan kampung mereka,” katanya.

Antara aktiviti yang dijalankan oleh kakitangan PKK UMS bersama komuniti ialah menganyam atap menggunakan daun kelapa untuk menyiapkan Pondok Malius di Puncak Gloria, menumbuk dan menampi padi serta

menghasilkan kraftangan manik.

Jakaria berkata, PKK UMS merupakan nadi penting universiti yang antara lain terlibat mengurus majlis rasmi universiti serta menyelaraskan hubungan awam dan publisiti menerusi rakan strategik media.



KERJASAMA: Kakitangan PKK UMS meletakkan daun atap di Pondok Malius.

Sementara itu, Pengerusi Jawatankuasa Kemajuan dan Keselamatan (JKKK) Kampung Sayap, Aming Gamburus berkata pihaknya bersyukur kerana UMS sering menjadikan Kampung Sayap sebagai pilihan mengadakan program khidmat komuniti.

“Ini menyebabkan kami yang tinggal di luar bandar sentiasa berasa tidak terpinggir dari arus pembangunan. “Kehadiran institusi ilmu seperti UMS mengadakan program secara konsisten benar-benar dirasakan oleh penduduk kampung di sini,” katanya.

Pada kunjungan itu, PKK UMS turut mengadakan perkongsian bertajuk ‘Apa Itu Scam’ kepada komuniti Kampung Sayap serta berkongsi bahaya mengenai penipuan itu yang sering menjejaskan warga emas dan komuniti luar bandar sebagai mangsa.



SILATURAHIM: Malam kebudayaan bersama komuniti Kampung Sayap.



ALBUM: Kakitangan UMS dan komuniti Kampung Sayap di Pondok Malius.